

Evening Dogri (NSD) Bulletin

19-03-2025

आकाशवाणी

खबरां प्रोमिला जम्वाल कोला

- मंत्रीमंडल नै घट्ट मूल्लें आहले BHIM-UPI लैन-देन दे बाद्दे लेई अज्ज इक प्रोत्साहन योजना गी मंजूरी देई दित्ती ऐ।
- सेहत मंत्री जे.पी नड्डा होरें आखेआ जे सेहत नीति 2017 इक व्यापक संगठित रौं रवैये आहली नीति ऐ।
- केंद्री राज्यमंत्री डॉ. जितेंद्र सिंह होरें आखेआ ऐ जे 2035 तकर भारत दा अपना इक अंतरिक्ष केंद्र होग ते 2040 तकर चंद्रमा पर अंतरिक्ष यात्रू भेजी दित्ता जाग।
- राष्ट्रपति ते प्रधानमंत्री होरें नासा टीम गी सुनीता विलियम्स ते बाकी अंतरिक्ष यात्रुएं गी सुरक्षित ढंग्गै सिर परताई लेयोने पर मुबारक दित्ती ऐ।
- भारत नै गाजा च सब्भनें बंधकें गी रिहा करने दा आह्वान कीता।
- बैडमिंटन च ट्रीसा गायत्री दी जोड़ी स्विस ओपन दे दुए राउंड च पुज्जी गेई ऐ।

<><><><><><>

BHIM-UPI

सरकार नै घट्ट मूल्य आहले भीम-यूपीआई लैनदेन गी बढ़ावा देने आस्तै अज्ज इक प्रोत्साहन योजना गी मंजूरी दित्ती। योजना पर इक हजार 500 करोड़ रुपे आस्तै अनदाजन खर्च कन्नै अमलावरी कीती जाग। नमी दिल्ली च अज्ज मंत्रीमंडल दे फैसलै बारै च सूचना ते प्रसारण मंत्री अश्विनी वैष्णव होरें आखेआ जे इस योजना कन्नै लौहके व्यौपारी बिना कुसै अतिरिक्त लागत दे यूपीआई सेवाएं दा लाह लेई सकडन्न। उने आखेआ जे लौहके कारोबारिणं गी दो हजार रुपे तकर दे लैनदेन आस्तै हर लैनदेन

मूल्य पर सिफर अशारिया इक-5 प्रतिशत दी दर कन्नै प्रोत्साहन प्रदान कीता जाग। श्री वैष्णव होरें आक्खेआ जे सरकार नै असम दे नामरूप च ब्रह्मपुत्र वैली फर्टिलाइजर कॉरपोरेशन लिमिटेड दे मौजूदा परिसर च इक नमा ब्राउनफील्ड अमोनिया-यूरिया कॉम्प्लेक्स नामरूप चार उर्वरक संयंत्र स्थापित करने दा फैसला कीता ऐ। उने आक्खेआ जे इस परियोजना कन्नै देशै च घरेलू यूरिया उत्पादन क्षमता बढ़ावे ते एह यूरिया दी बढ़ती मंग गी पूरा करौग। श्री वैष्णव होरें आक्खेआ जे सरकार नै महाराष्ट्र च जेएनपीए पोर्ट सोयां चौक तक छह लेन दे ग्रीनफील्ड हाईवे दे निर्माण गी मंजूरी दिती ऐ। उने आक्खेआ जे इस परियोजना पर चार हजार 500 करोड़ रुपे दी लागत आग। एह परियोजना जेएनपीए पोर्ट ते नवी मुंबई अंतर्राष्ट्रीय हवाई अड्डे गी जोड़िऐ लॉजिस्टिक दक्षता च सुधार आस्तै बनाई गई ऐ। श्री वैष्णव होरें आक्खेआ जे सरकार नै बरे 2024-25 ते 2025-26 आस्तै संशोधित राष्ट्रीय गोकुल मिशन दी अमलावरी गी मंजूरी दिती ऐ। उने आक्खेआ जे इस योजना कन्नै दुग्ध उत्पादन ते उत्पादकता च टकोदा बाढ़ा होग ते करसानें दी आमदन च बाढ़ा होग।

<><><><><><>

Health-Minister

सेहत मंत्री जगत प्रकाश नड्डा होरें आक्खेआ ऐ जे 2017 बरे च पेश कीती गेदी सेहत नीति इक व्यापक नीति ऐ जेदे च मरीज दी दिक्ख-रिक्ख, ओदे ईलाज मुआलजे, पुनर्वास ते बीमारी दी रोक आहले दृष्टिकोण शामिल कीते गेदे न। राज्यसभा च सेहत ते परोआर कल्याण दी कारकरदगी पर होई दी चर्चा दे परते च उने आक्खेआ जे पैहले दिएं सेहत नीतिएं च छड़ा इलाज मुआलजे गी गै तरजीह दिती जंदी ही। श्री नड्डा होरें विपक्ष आसेआ सेहत सहूलतें गी जमीनी सतह तगर पजाने दे बारे च दिते गेदे बयानें पर आक्खेआ जे एह राज्य सरकारें दे अधिकार खेत्तर च औंदा ऐ। उने आक्खेआ जे केंद्र फंडिंग तकनीकी सहयोग, नीति निर्धारण, योजना बनाइयै अनुसंधान करियै राष्ट्रीय सेहत मिशन दे लक्ष्य हासल करने च मदाद करी सकदा ऐ। उने आक्खेआ जे नरेंद्र मोदी सरकार नै आयुष ते एलोपैथी दौने पद्धतिएं पर ध्यान केंद्रित कीते दा ऐ।

<><><><><><>

LS-Jitendra Space

भारत नै 2035 च अपना स्पेस स्टेशन भारत अंतरिक्ष स्टेशन बनाने दी योजना बनाई ऐ ते जेकर सारी योजना ठीक होई जंदी ऐ तां 2040 तोहड़ी इक्क भारतीय एस्ट्रोनॉट चंद्रमा उप्पर जाग। प्रधानमंत्री दफ्तर च राज्यमंत्री डॉ. जितेंद्र सिंह होरें अज्ज लोकसभा च एह गल्ल आक्खी। श्री सिंह होरें आखेआ जे चंद्रयान-4 गी 2 प्रक्षेपण यानें दे राएं प्रक्षेपित कीती जाग ते एहदे पंज घटक होंगन। उनें एह बी आखेआ जे गगनयान दी इक महिला रोबोट कन्नै परीक्षण उडान इस बरे दे खीरी तगर शुरू कीती जाग।



Astronaut

अंतरिक्ष जात्तरी नासा दे सुनीता विलियम्स ते बुच विलमौर होर अज्ज बडुलै मूंह न्हरे स्पेस एक्स ड्रैगन दे अंतरिक्ष यान च धरती पुज्जी गए ना। दवें अंतरिक्ष यात्री जून 2024 थमां अंतरराष्ट्री अंतरिक्ष स्टेशन च हे। एह 2 हफ्तें आस्तै उल्थे गए हे ते अंतरिक्ष यान थमां हिलियम दे रसाव ते रफ्तार च कमी कारण उनेंगी अंतरिक्ष स्टेशन पर 9 महीनें तोड़ी रूकना पेआ। इन्दे कन्नै नासा दे निक हेग ते रूसी अंतरिक्ष यात्री अलेक्जेंडर गोरबुनोव बी ऐ हे। विलमौर ते विलियम्स पिछले बरे जून महीने थमां अंतरराष्ट्रीय अंतरिक्ष स्टेशन पर हे। इनें अंतरिक्ष यात्रुएं गी मगरा टेक्सस दे ह्यूस्टन च जानसन अंतरिक्ष केंद्र लेता गेआ जित्थें सेहत विशेषज्ञें इंदी जांच कीती। लम्में समें तगर अंतरिक्ष च रौने करी अंतरिक्ष यात्रुएं दिएं हड्डियें दा घनत्व घट्ट होई जंदा ऐ ते मासपेसिएं गी बी नुकसान पुजदा ऐ। इनें गी इक व्यापक बर्जिश कार्यक्रम दित्ता जाग जेदे नै उन्दे शरीर गुरुत्वाकर्षण कन्नै रौहने लेई अनुकूल होई सकन। राष्ट्रपति द्रौपदी मुर्मू होरें सुनीता विलियम ते बुच विलमौर होरेंषी सुरक्षित धरती उप्पर आहनने लेई नासा दी पूरी टीम गी मुबारकबाद दित्ती ऐ। सोशल मीडिरू दी इक पोस्ट च राष्ट्रपति होरें आखेआ जे सुनीता विलियम ते उन्दे साथियें बडे मजबूत जज्बेए निष्ठा ते सब्र दा परिचय दिंदे होई हर कुसा गी प्रेरित कीता ऐ। अंतरिक्ष यात्रुएं दी एह इक नेही ऐतिहासिक यात्रा बनी गई ऐ जेड़ी पक्क ध्यायी, तालमेल कन्नै कम्म करने ते विलक्षण हिम्मत ते दलेरी दा सबूत दिंदी ऐ। प्रधानमंत्री नरेंद्र मोदी होरें नासा दे अनथक यत्न लेई उनेंगी मुबारक दित्ती। अपनी इक सोशल मीडिया पोस्ट च

प्रधानमंत्री होरें लिखेआ जे सुनीता विलियम्स ते कू-9 दे बाकी अंतरिक्ष यात्रुएं, दुनिया गी इक बारी फी दस्सी ओड़ेआ ऐ जे दृढता असलै च केहू होंदी ऐ। उनें आखेआ जे एहू उंदी हिम्मत, हौसले दा इस्तेहान हा जिन्नै करोड़ें लोकें गी प्रेरित कीता।

<><><><><><>

Gaza

विदेश मंत्रालय नै अजज गाजा दी स्थिति पर चिंता प्रगट कीती ते सब्भनें बंधकें गी रिहा करने दा आह्वान कीता। इक बयान च मंत्रालय नै गाजा दे लोकें गी मनुक्खी सहायता दी आपूर्ति जा रखने दी गुजारिश कीती।

<><><><><><>

Punjab-Farmers

पंजाब दे करसानें ते केंद्र ते राज्य सरकार दे प्रतिनिधिएं मझाटै चंडीगढ़ च लग्गी दी बैठक सम्पन्न होई गेई। एहू मीटिंग 3 घंटे चली। अगली मीटिंग 4 मई गी होगी। संयुक्त करसान मोर्चा गैर सियासी ते करसान मजदूर मोर्चा बनाने आलिं 28एं करसान संघें दे प्रतिनिधिएं, केंद्री कृषि मंत्री, शिवराज सिंह चौहान, वाणिज्य मंत्री पीयूष गोयल ते उपभोक्ता मामलें दे मंत्री प्रहलाद जोशी हुंदे कन्नै मीटिंग लाई। मीटिंग च पंजाब दे कृषि मंत्री गुरमीत सिंह खुदियां, खजाना मंत्री हरपाल सिंह चीमा ते कैबिनेट मंत्री चेतन सिंह जौरा माजरा बी मौजूद हे। दौनें मोर्चे दा प्रतिनिधित्व जगजीत सिंह दल्लेवाल ते सरवन सिंह पंदेर होरें कीता।

<><><><><><>

Prez. Udyam Utsav

राष्ट्रपति द्रौपदी मुर्मू होर कल राष्ट्रपति भवन दे अमृत उद्यान च उद्यम उत्सव च हिस्सा लैडन। एहू कार्यक्रम सूखम, लौहके ते मझाटले उद्यम मंत्रालय आसेआ आयोजित कीता जा'रदा ऐ। एहूदा समापन 30 मार्च गी होगी। उद्यम उत्सव दा मकसद देसै दी जीवंत विरासत गी नागरिकें तगर पजाइयै

एम.एस.एम.ई गी तगडा ते प्रोत्साहित करना ऐ। इस आयोजन च 7 पेविलियन बनाए जांगन जिंदे च दस्तकारी दे समेयान थमां लेइयै कृषि आधारित उत्पादें दी नुमैश लाई जाग। पेविलियन च हरित एम.एस.एम.ई तकनीकें, महा उद्यमिं, पी.एम विश्वकर्मा ते जनजातीय उद्यमिं खादी ग्रामोद्योग ते एम.एस.एम.ई बपार समर्थन, उद्यमिं गी बी प्रदर्शित कीता जाग।

<><><><><><>

Shah-CRPF Day

गृह मंत्री अमित शाह होरें केंद्री रिजर्व पुलस बल दे सब्भनें अधिकारियें ते जवानें गी अज्ज सी.आर.पी.एफ दिवस 2025 पर शुभकामनां दित्तियां न। सोशल मीडिया दी इक पोस्ट च गृह मंत्री होरें आखेआ ऐ जे अज्जै दे ध्याडे सन 1950 च बल गी प्रेजिडेंट्स कलर कन्नै सम्मानित कीता गेआ हा। उनें आखेआ जे सी.आर.पी.एफ दी दलेरी ते बलिदान औने आहली पीढियें गी सदा प्रेरित करदा रौहग। श्री शाह होरें देसा लेई सर्वोच्च बलिदान देने आहले दलेर जवानें गी नमन कीता।

<><><><><><>

PM-MKB

प्रधानमंत्री नरेन्द्र मोदी होर म्हीने च इक बारी प्रसारत होने आले अपने रेडियो कार्यक्रम “मन की बात” इस बारी 30 मार्च गी देश विदेश च रौहने आले श्रोताएं कन्नै बचार सांझे करगंन। हर म्हीने दे खीरले ऐतवार बडलै 11 बजे प्रसारत होने आले इस कार्यक्रम दी एहू 120मीं किशत होगा। कार्यक्रम च शामिल करने लेई लोक अपने बचार ते सुझाहू 28 तरीक तगर टोल फ्री नंबर 1800-11-7800 पर भेजी सकदे न। एहूदे इलावा लोक अपने बचार My Gov ते नरेन्द्र मोदी ऐप पर बी भेजी सकदे न। एहू कार्यक्रम आकाशवाणी ते दूरदर्शन दे समूलचे नेटवर्क दे इलावा न्यूज ऑन एयर मोबाइल ऐप पर बी उपलब्ध रौहग। एहूदे कन्नो कन्नी एहूदा सिद्धा प्रसारण ए.आई.आर न्यूज, डीडी न्यूज, प्रधानमंत्री हुंदे दफ्तर ते सूचना ते प्रसारण मंत्रालय दे यूट्यूब चैनलें पर बी कीता जाग। आकाशवाणी जम्मू पर मन की बात दे तुरत मगरा एहूदा डोगरी च अनुवाद प्रसारत कीता जाग। एहूदा डोगरी अनुवाद तुस रातीं 8 बजे इक बारी परतियै सुनी सकदे ओ।



Swiss-Open

बैडमिंटन च भारत दी त्रीसा जॉली ते उसदी जोड़ीदार गायत्री गोपीचंद बेसल स्विटजरलैंड च खेड्डी जारदी स्विस् ओपन दे महिला डबल्स दे दुए राउंड च पुज्जी गेइयां ना। पैहले पायदान दी इक भारतीय जोड़ी नै स्विटजरलैंड दी Aline Muller ते नीदरलैंड दी Kelly Van Buiten गी पैहले राउंड च 21-16, 21-17 कन्नै हराया। त्रीसा ते गायत्री हून Selin Hubsch ते Amelia Lehmann दी जर्मन जोड़ी कन्नै कल प्री क्वार्टरफाइनल च मैच लांगन।



IMD

मौसम विभाग नै पच्छमी राजस्थान, पूर्वी मध्य प्रदेश, छत्तीसगढ़, झारखंड, पंजाब, नागालैंड, मणिपुर, मिजोरम, तमिलनाडु, पुडुचेरी, केरल ते माहे च तेज हवा ते गरज कननै बरखा दा अंदाजा लाया गेदा ऐ। तोआंई गुजरात ते कर्नाटक दे अन्दरुनी हिस्से दे किश थाहरें पर गर्म ते उमस भरोची दी स्थिति बने रौहने दी संभावना जताई गेई ऐ, जेडी अगले 2 सोयां 3 दिनें तकर जारी रेई सकदा ऐ। विभाग मूजब, अगले 2 दिनें दौरान देशै दे उत्तर-पश्चिम हिस्से च बद्दोबद्द तापमान च लगभग 2 सोयां 3 डिग्री सेल्सियस दा बाद्दा होने दी संभावना ऐ इस क्षेत्र च ज्यादातर तापमान 32 डिग्री सेल्सियस ते घट्टोघट्ट तापमान 16 डिग्री सेल्सियस दे कोलकाल रेई सकदा ऐ।



Bandipora-IED

सुरक्षाबलें बांडीपोरा दे अरागाम च इक आई.ई.डी दा पता लाइयै उसी नकारा करी दित्ता। चिनार कोर नै अपनी इक सोशल मीडिया दी पोस्ट च जानकारी दित्ती जे आई.ई.डी बांडीपोरा-श्रीनगर शिडक पर लब्बी जिसी सुरक्षाबलें सुरक्षित ते नियंत्रित ढंगगे सिर नकारा बनाया। इयां करियै सुरक्षाबलें इक बड्डे हादसे गी टाल्ली दित्ता। एहदे कन्नै नागरिकें दी सुरक्षा प्रति सुरक्षाबलें दी

बचनबद्धता दा पता लगदा ऐ। भारतीय सेना जम्मू-कश्मीर गी आतंकवाद थ्वां मुक्त बनाने लेई बचनबद्ध ऐ।

<><><><><><>

Sakeena-Nitin Wages

सेहत ते मेडिकल शिक्षा मंत्री सकीना इतू होरें सदन गी जानकारी दिती जे राश्ट्रीय सेहत मिशन तैहत जम्मू-कश्मीर च कम्म करा रादे कर्मिं दी उजरत गी 2021-22 च 15 थ्वां 17 फीसद तगर बदाया गेआ ऐ, सलाना 5 फीसद दे बाद्दे कन्नै। मंत्री होरें एहू जानकारी विक्रम रंधावा हुंदे आसेआ पुच्छे गेदे सोआलै दे परते च दिती। उनें साफ कीता जे एन.एच.एम लेई पूरी चाल्ली केंद्री सेहत ते परोआर कल्याण मंत्रालय आसेआ फंड उपलब्ध करोआया जंदा ऐ ते एन.एच.एम कर्मियें दी तनखाई बारै कोई बी फैसला लैने थ्वां पैहले केंद्रीय मंत्रालय दी मंजूरी लाजमी ऐ। आर.एस पठानिया ते डॉ. रामेश्वर सिंह हुंदे आसेआ पुच्छे गेदे जिमनी सोआलै दे परते च मंत्री होरें आखेआ जे पक्का करना ते उजरत च बाद्दा करने आहले मसले गी केंद्र सरकार कन्नै पुट्टेआ जाग।

<><><><><><>